

Naziv suda: Apelacioni sud Brčko distrikt Bosne i Hercegovine

Analiza pokazatelja iz statističkog izvještaja o poštivanju optimalnih i predvidivih rokova:

Podaci iz godišnjeg Izvještaja o poštivanju optimalnih i predvidivih rokova za 2019. godinu pokazuju da je u radu bilo ukupno 807 predmeta, od čega je završeno 766 predmeta ili 95 %. Od ukupnog broja riješenih predmeta, u optimalnom roku je završeno 694 predmeta ili 91 %, dok je u predvidivom roku završeno 766 predmeta ili 95 %. U ovom izvještajnom periodu 36 predmeta je završeno sa prekoračenjem predvidivog roka ili 5 % od ukupnog broja završenih predmeta. Navedeni podaci pokazuju da je neznatno smanjen broj predmeta u kojima je prekoračen predvidivi rok u odnosu na prethodnu godinu. Prosječno trajanje riješenih predmeta iznosi 87 dana, ali treba naglasiti da je vrijeme rješavanja predmeta na osnovnim referatima u pravilu kraće i od utvrđenih optimalnih rokova. Tako na primjer: optimalni rok na drugostepenom parničnom referatu iznosi 207 dana, a predmeti su rješavani prosječno u roku od 120 dana; optimalni rok za drugostepeni postupak u privrednim sporovima iznosi 187 dana, a predmeti su rješavani prosječno za 117 dana; optimalni rok za drugostepene krivične predmete iznosi 158 dana, a predmeti su rješavani prosječno za 72 dana; optimalni rok u drugostepenim prekršajnim predmetima iznosi 70 dana, a predmeti su rješavani u prosjeku za 30 dana; optimalni rok za revizione predmete je 151 dan, a revizije su rješavane prosječno u roku od 151 dan.

Predvidivi rokovi su uglavnom prekoračeni na referatu vanrednih pravnih lijekova u građanskim predmetima (14 predmeta), drugostepenom vanparničnom referatu (7 predmeta) i drugostepenom parničnom referatu (7 predmeta). Prekoračenje rokova na pomenutim referatima je posljedica boravka na bolovanju dužem od 6 mjeseci jednog sudije sa građansko-privredno-upravnog odjeljenja, jer su predmeti kojima je zadužen navedeni sudija riješeni u III i IV kvartalu 2019. godine.

Broj neriješenih predmeta na kraju 2019. godine iznosi 41 predmet, što predstavlja umanjeње broja neriješenih predmeta u odnosu na prethodni period za 17 predmeta ili 33 %. U strukturi nezavršenih predmeta u 25 predmeta ili 61 % nije prekoračen predvidivi rok, dok su u 18 predmeta, odnosno 16 predmeta prekoračeni optimalni/predvidivi rokovi. Prosječno trajanje neriješenih predmeta je 246 dana. Ovaj podatak umanjuje efikasan rad suda imajući u vidu da je u 2019. godini sud dostigao indeks ažurnosti od 109 %, a broj neriješenih predmeta smanjio na samo 56 predmeta, tako da smanjenje broja neriješenih predmeta iznosi 41 %. Međutim, dugo prosječno trajanje neriješenih predmeta je direktna posljedica četiri neaktivna, „zatvorena“ predmeta, zbog nemogućnosti formiranja novog tročlanog sudskog vijeća usljed nedostatka jednog sudije. Sud je očekivao da će Visoko sudsko i tužilačko vijeće BiH izvršiti imenovanje jednog dodatnog sudije u Apelacioni sud Brčko distrikta BiH po raspisanom konkursu iz avgusta 2018. godine. Međutim, do imenovanja novog sudije nije došlo po okončanoj konkursnoj proceduri, pa se očekuje raspisivanje novog konkursa i imenovanje novog sudije u prvoj polovini 2020. godine, ukoliko se budu poštovali propisani rokovi. U slučaju da u predviđenim rokovima ne dođe do imenovanja novog sudije predsjednik suda će pokrenuti postupak za privremeno upućivanje jednog sudije Suda BiH ili jednog sudije vrhovnih sudova entiteta sa građanskog referata u Apelacioni sud Brčko distrikta BiH u svrhu učestvovanja u radu na rješavanju pojedinačnih predmeta u kojima nije moguće formirati novo tročlano vijeće zbog nedostatka jednog sudije.

Analiza navedenih podataka, struktura riješenih i neriješenih predmeta sa aspekta poštovanja optimalnih i predvidivih rokova, pokazuje da u sudu ne postoje problemi koji utiču na efikasnost suda, osim nemogućnosti formiranja vijeća u četiri „zatvorena“ predmeta.

Analiza raspoloživih resursa u sudu:

Apelacioni sud Brčko distrikta Bosne i Hercegovine je u ovom izvještajnom periodu raspolagao sa optimalnim materijalno-tehničkim resursima.

Prema usvojenoj sistematizaciji sva radna mjesta su popunjena, osim jedne pozicije dodatnog sudije, čije se imenovanje konačno očekuje u prvoj polovini 2020. godine.

U ovom izvještajnom periodu jedan sudija sa građansko-privredno-upravnog referata bio je odsutan, zbog bolovanja, duže od šest mjeseci.

Analiza „perioda neaktivnosti“ u predmetima:

Na krivičnom referatu ne postoje zatvoreni predmeti, osim predmeta koji su postali privremeno nerješivi zbog generalnog štrajka advokata počev od 26.04.2019. godine. Na građansko-privrednom odjeljenju, na referatu vanrednih pravnih lijekova neaktivna su 4 predmeta zbog procesne nemogućnosti formiranja vijeća u novom sudijskom sastavu.

Prijedlog mjera kako bi se utvrđeni predvidivi rokovi skraćivali i približavali optimalnim rokovima:

Predsjednik suda je nastavio sa potenciranjem dužnosti sudija na rješavanju najstarijih predmeta u sudu u skladu sa Planom rješavanja starih predmeta za 2019. godinu. Preduzete mjere su dale rezultate tako da je zadržan visok procent od 95 % riješenih predmeta u optimalnim odnosno predvidivim rokovima, dok je vrijeme trajanja riješenih predmeta manje od tri mjeseca. Pored toga, zadržana je povoljna struktura neriješenih predmeta s obzirom da je ostao nezavršen samo 41 predmet i u 61 % tih predmeta nije prekoračen predvidivi rok.

Izborom jednog dodatnog sudije u toku 2020. godine očekuje se hitno rješavanje „zatvorenih“ predmeta i potpuno ažuriranje suda, imajući u vidu činjenicu da je koeficijent eliminacije neriješenih predmeta na kraju 2019. godine manji od 0,1.

Ostalo: